



GOVERNMENT OF NIUE

FAKAILOAAGA MAHUIGA

KUA LEVEKI KE HE TAGATA GAGAO COVID HE KAINA NOFO PUIPUI GAGAO KA E HAOHAO MAFOLA AGAIA E TAU TAGATA HE MOTU

Kua Fakatumau e Fakatufono ke nofo e motu he Hātakiaga Papahi Lanu Moana mo e Amaamanaki ke tufa ke he tau Tagata oti he Motu e tau Koloa Fakameā he Tagata.

Alofi, Niue – 10 Mati 2022 - Talimai he iloa kua moua he taha tagata e gagao COVID-19 tuga he fakailoa he aho Ua, aho 8 ia Mati, kua manatu ke fakailoa nakai fai gagao COVID-19 he tau maaga. Ko ia ne moua he moko gagao COVID-19, haia ne nofo he kaina puipui gagao ti malolō a ia mo e nakai fai fakakiteaga gagao ka ono mata kia ia.

Ko Niue he magaaho nai kua nofo he Hātakiaga Papahi Lanu Moana ti ko e tau kaugahua ne fehagai lahi mo e tau vahega gahua ti pihia mo e malē vakalele, kua muitua ke he tau poakiaga ke tui he tau taute puipui katoatoa tali mai he moua e tagata gagao fakamua i Niue. Kua fakatumau foki ke he tau gahua tivi tuga he omai he hala.

Talahau e Ikipule he Faahi Malolō Tino kua molea e 97 pasene he puke tagata pauaki ne kua huki (12 e tau ki luga) ti molea foki 96 pasene a lautolu he atu tau 18 ki luga ne kua moua e tau huki ke lagatolu aki.

Talahau foki e Lilifu Ikipule Tongatule, to fakahoko foki e tivi he aho ke tolu aki he aho nai, muitua ke he tau levekiaga he tagata gagao nai. Ko e tau kau gahua ne fehagai lahi mo e gahua nai kua nonofo puipui a lautolu ke he 7 e aho, to tivi foki he aho nai. Ka e kia fakatumau e tau tagata oti he motu ke muitua ke he tau hātakiaga mai he tau ekegahua he Faahi Malolō Tino ke fakahautoka, feofanaki, fekapitigaaki mo e fakamalolō ke muitua ke he tau mahani fakameā.

Talahau foki e Lilifu ko Tongatule, to tufatufa he Faahi Gahua Malolō Tino he aho nai, ke he tau magafaoa takitaha i Niue, e tau koloa fakameā fakatagata ha ko e fakatokaaga puipui he tau tagata, ke totoko ke he gagao COVID-19.

Talahau foki e Lilifu Tongatule to moua oti he tau magafaoa takitaha i Niue e tau koloa fakameā fakatagata tuga a nai, ko e tau puha pa ihu, ko e tau afi lima, ko e tau pepa fagu ihu mo e tau pepa fakameā, magamoli, vai moli tamate moko, moli fakameā moko mo e tau gati taga tuku veve. Kua tauteute ai 600 e taga koloa ke tufatufa ki Niue katoa ti kua gahua auloa mo e tau matakau Takitaki Maaga ke iloa mooli e puke tagata he maaga.

Talahau e Ulufakatonu mo e Takitaki he tau Ekekafo he Faahi Malolō Tino, kua fakaue lahi a ia ha ko e ha hā i Niue e kaugahua mai he Pacific Medical Association Medical Assistance Team (PACMAT) mai Niu Silani. Ko e matakau PACMAT ne gahua ai e tau pulotu kehekehe he Faahi Gahua Malolō Tino ne amanaki tumau ke lagomatai e tau faahi gahua malolō tino he tau motu he atu Pasifika ka tupu e tau lekua mo e tau gagao tupu fakaoho.

Talahau foki e Ekekafo ko Edgar Akau’ola, ko e mena fakatū he Matakau Pasifika Medical Association (PMA) e matakau PACMAT ne ha hā i Niue he magaaho nai ke lagomatai e faahi gahua malolō tino ha Niue, mua atu ke he kaugahua ne gahua ke totoko ke he gagao COVID-19.

Ko e gahua lahi he matakau PACMAT ke fakamalolō e tau kau gahua he tau atumotu, ke lalafi atu mo e gahua auloa a lautolu he tau magaaho fai lekua po ke tau gagao tupu fakafo he lalolagi. Kua lahi e fiafia ha ko lautolu haia he motu he magaaho nai ke gahua auloa ke taofi mo e puipui ke nakai pikitia taha he moko gagao COVID nai.

Talahau foki e ekekafo ko Edgar Akau'ola ko e puhala lagomatai a nai ma e tau magafaoa, oti he motu ke fai koloa fakameā fakatagata mo leveki mo e puipui mai he gagao nai, tuga ne kua fakatoka ma e gagao COVID-19.

Kua ole fakatokolalo foki e ekekafo Akauola ke he tau tagata ke nonofo amaamanaki tumau mo e mahani fakameā, maitua ke he tau hātakiaga he Faahi Gahua Malolō Tino, ke kautū e tamateaga he moko gagao COVID-19 i Niue.

FAKAOTI